



МЕСЯЦА ОКТЯБРЯ В 29-Й ДЕНЬ

**Святая преподобномученицы
Анастасии Римляныни
и преподобного отца нашего
Авраамия Затворника**

На Господи, воззвах: стихиры мученицы, глас 8.

Подобен: Что вас наречем:

Мученице страсотерпице всехвальная, / воздержанием страсти низложивши плотския, / страданием змия умертвила еси врага, / Ангелы удививши болезнями твоими, / человеки обвеселивши страданиями твоими, / монашествующих удобрение, / девства сосуд. / Моли спасти и просветити души наша.

Что ты возыменуем, славная? / Девства добротами невесту просиявшу Христову, / дочь избранну Вышняго Иерусалима, / сожительницу Ангелов и собеседницу, / чертога мысленнаго наслаждающуся, / Анастасие многострадальная, / монашествующих удобрение. / Моли спасти и просветити души наша.

Терпела еси зубов искоренение, / рук отсечение, и ног, и сосцев, / ссекаема на уды от беззаконных мучителей, / к доброте Жениха взирающи / и болезни паче естества терпящи, / Анастасие многострадальная, / невесто Христова нетленная, / моли спасти и просветити души наша.

Ины стихиры преподобного, глас тойже.

Подобен: О преславнаго чудесе:

Отче Богомудре Авраамие, / Аврааму подоб-

ник быв дѹхом, / пресельник был еси земли отеческия, блаженне. / Плоти пожелания отверг / и, в хижине малей заключив, радуясь, тело твое, / душу же вперил еси к Небеси, / идеже житие яже стяжал еси.

Преподобне отче Авраамие, / Авраамскую душу тезоименно стяжав, / напасти претерпел еси, / верою Божественною укрепляемь / и любовь Богу соединяемь, / обетования землю наследовал еси, / украшаемь добродетелей светлостью. / Тем же, веселящаяся, твою память торжествуем.

Преподобне отче Авраамие, / прелестями люте поглощенную змием / и поболзшуюся погибели в ров / Промыслом Божественным возвел еси / и спасаему Богу представил еси. / Еяже покаянию вси удивившася, / благочестно Господа славящий Препоблаго.

Слава, и ныне, Богородичен:

Радуйся, Света Божественнаго носило, / пресветлый свещниче, Пресвятая Богоневесто: / Свет нам возсияла еси от пречистою боку Твоею, / просвещая мира концы / и освящая Своєю благодатью. / Радуйся, начало нашего спасения, Чистая. / Радуйся, страшное слышание и глаголение надеющихся на Тя.

Крестобогородичен:

Что зримое видение, / еже Мойма очима видится, о Владыко! / Содержай всю тварь, на Древо воздвиген быв, / и умираши, всем дай жизнь; / Богородица, плачущи, глаголаше, / егда узре на Кресте возносима, / из Нея неизреченно возсиявшего / Бога и Человека.

Тропарь святых, глас 4:

Агница Твоя, Иисусе, Анастасия, / зовет великим гласом: / Тебе, Женище мой, люблю / и, Тебе ищущи, страдальчествоую, / и сраспинаюся, и спогребаяюся Крещению Твоему, / и стражду Тебе ради, яко да царствую в Тебе, / и умираю за Тя, да и живу с Тобою; / но, яко жертву непорочную, прими мя с любовью, пожержуюся Тебе. / Той молитвами / яко Милостив спаси души наша.

Слава, преподобнаго, глас 8:

В тебе, отче, известно спасется еже по образу:

приим бо крест, последовал еси Христу / и, дѣя,
учил еси презирати убо плоть, преходит бо, /
прилежати же о души, вещи безсмертной. / Темже
и со Ангелы срадуется, преподобне Авраамие,
дух твой.

НА УТРЕНИ

Канон преподобных.

Егоже краегранесие: Мужеския твоя, мученице, восхва-
лю болезни. Творение Иосифово. Глас 8.

Песнь 1

Ирмос: Поим Господеву, / проведшему люди Своя скво-
зе Чермное море, / яко един славно прославися.

Сию светоносную память твою почитающему,
Богомудрая, / просвещение ми подаждь, души
моя тьму отгонящи.

Всю от пелен тебе самую возложила еси
Зиждителя твоему / и огнем воздержания телес-
ныя страсти попала еси.

К высотѣ мучения, мученице, возшла еси,
непощадѣвши плоти, / и чертогов мысленных, яко
дева, сподобилася еси.

Богородичен:

Тя, небомѣрную Лѣствицу, / на нейже Бог
утвердися, человеки Небесны соделав, / Отроко-
вице, почитаем.

Ин канон преподобнаго. Егоже краегранесие: Твое че-
ствую всесветлое житиѣ, блаженне. Иосиф. Глас тойже.

Песнь 1

Ирмос: Воду прошед, яко сушу, / и египетскаго зла
избежав, / израильтянин вопиаше: / Избавителю и Богу
нашему поим.

Божественными сияя блистании, / светонос-
ный твой совершающия праздник, / страстей ом-
рачѣния, всеблаженне, молитвами твоими, Авра-
амие, избави.

Божественное разжже твою душу, блаженне,
желание, / угаси плотская разжжения, отче, / и
невещественно на земли ты жити сотвори.

Умертвив уды, яже на земли, пощением и
всякими злостраданими, отче мудре, / Жизни спо-
добился еси лучшия на Небесех, / Богоносе Авра-
амие.

Богородичен:

От кровей Твоих священных / Бога Отца Слово воплотися преестествонно, Дево Марие, / Егоже моли плотская моя умертвити възгра́ния.

Песнь 3

Ирмос: Ты еси утверждение / притекающих к Тебе, Господи, / Ты еси свет омраченных / и поет Тя дух мой.

Стояла еси пред судищем мучителя, / Христа, славная, Творца всех и Владыку, / Бога Слова проповедаючи.

Доброта сердечная видимым зраком, славная, издавшись, / тя, краснейшую, зрящим явила есть.

Богатство неистоимо исцелений тебе подаде, отроковице, Христос, / Егоже нищету вольно возлюбила еси.

Богородичен:

Вещь грехов моих / Твоих молитв огнем попали, Мати Света, / росу ми Божественную оставления носящи.

Ин

Ирмос: Небеснаго круга Верхотворче, Господи, / и Церкви Зиждителю, / Ты мене утверди в любви Твоей, / желаний краю, верных утверждение, / еди́не Человеколюбче.

Всеобразно возжелев желаний конечное, / мира и плоти, Богоносе, вне был еси, / тем восприял еси премирную славу и вечнующее, отче, наслаждение.

Храм жив явился еси вседетельнаго Духа, отче, / в хижине тело заключив, преподобне. / Темже облистал еси добродетелей лучами, священо обожаемь, блаженне Авраамие.

Деланием болезней, добродетелей зрел, преподобне, / израстил еси клас стори́чествующь, имже питаются честно / честное твое усение торжествующии.

Богородичен:

В Тебе, Всесвятая, / всего Виновный за премногое милосердие хотя вселися и освяти человеческое существо, / преступлением пер́вое пополнившееся.

По 3-й песни кондак Анастасии, глас 3.

Подобен: Дева днесь:

Девства водами очищенна, преподобная, / му-

ченичества кровью, Анастасие, венчавшись, /
подавши сущим в нуждах недугов исцеление и
спасение, приступающим от сердца, / крепость бо
тебе подаёт Христос, / источая благодать присно-
текущую.

Седален, глас 8.

Подобен: Премудрости:

Воздержания росью страстей погасила еси
пламень юношески, / огнём же кровей твоих всю
прелесть погасила еси / и Жениху Слову, яко
дар, принесла еси честное девство и доблествен-
ное страдание. / Темже в чертог введё ты славы,
светле добльствовавшую и змия поправшую. /
Анастасие многострадальная, моли Христа Бога /
грехов оставление подати чтущим любовь свя-
тую память твою.

Слава, преподобнаго, глас 1.

Подобен: Гроб Твой:

Иже древнему Аврааму подобяся, отче, / уда-
лился еси сродников по плоти, / повинуюся, Авра-
амие, глаголу Бога нашего. / Темже, постився, и
душу светлейшу показал еси солнечных лучь, /
Богомудре всеблаженне.

И ныне, Богородичен:

Настави ны на путь покаяния, / уклонившая
присно к безпутием зол и Преплагаго прогневав-
шая Господа, / Неискусобрачная, Благословен-
ная Марие, прибежище отчаянных человеков, /
Божие обиталище.

Крестобогородичен:

Нескверная Агница, / Агница и Пастыря, пове-
шена на Древе, мертва зрящи, / плачущи веща-
ше, матерски восклицающи: / како претерплю
Твое, еже паче слова, Сыне Мой, снятие и
вольныя страсти, Боже Преплагий?

Песнь 4

Ирмос: Услышах, Господи, / смотрения Твоего
тайнство, / разумех дела Твоя / и прославих Твое Боже-
ство.

Тя, иго легчайшее Христово, мученице, понес-
шую от юности, / железное уже носитьи пребезза-
коннующии осудisha.

Капли кровей твоих многобожия угасisha

углие,/ лучи же чудес твоих страстей вещь
попалиша.

Не обнажи благодати, тело твое обнажив,
лукавнейший,/ исткану же паче свыше нераз-
драну ризу исходатаи тебе.

Богородичен:

По рождестве пребыла еси нетленна Дева,
якоже прежде рождества,/ Юна бо Младенца
родила еси, прежде век познаваема.

Ин. Ирмос тойже

Струями, отче, слез твоих душевныя скверны
омыв,/ Божественное был еси Духа и честное,
всеблаженне, жилище.

Бдение всеночно, молитву непрестанну,/ без-
пристрастие и любовь нелицемерну,/ и совер-
шенну веру удержал еси.

Исцеляти страсти и отгонити, преподобне,
духи,/ благодать приял еси, Авраамие,/ яко Бо-
жий угодник истиннейший.

Богородичен:

Унынием одержима и грехом ныне
погружена,/ мольбою Твоею избави мя,/ Богоро-
дице, Мати Приснодево.

Песнь 5

Ирмос: Утренююще, вопиём Ти,/ Господи, спаси ны:/
Ты бо еси Бог наш,/ разве Тебе, иного не вемы.

Не изнурена огнем вещественным явилася
еси,/ мученице Анастасие,/ огонь бо ты сердечный
Божественныя любви орошаше.

Удареньми лица, мученице Анастасие,
украшившись,/ врагов отразила еси мерзкое не-
разумие.

Протяжена на древе, Богомудрая Анастасие,
любвию Жениха твоего Божественную страсть
образовала еси.

Богородичен:

Поем Тя, Всепетая Владычице Богородице,
Бога бо препетаго/ плотию родила еси, Пречи-
стая.

Ин

Ирмос: Вскую мя отрубил еси/ от лица Твоего, Свете
незаходимый,/ и покрыла мя есть чуждая тьма
окаяннаго;/ но обрати мя и к свету заповедей Твоих/
пути моя направи, молюся.

Яко плодови́тая розга́, / грóзды израсти́л еси, /
отче Авраамие, добродетелей Божественных, /
умиления вино точа́щая и страсте́й пьянство от
душ отгоня́ющая, / и сердца́ верных веселя́ющая.

Напа́сти тебе различны / зми́й вселука́вый,
отче, **воздв́иже, /** но того оружием креста, Бого-
носе, **умертви́л еси, /** и победы венец от Бога
пра́ведным судо́м прия́л еси, Богомудре Авра-
амие.

Святы́ни дом, о́тче, / Божественнаго Ду́ха ве-
рою быв, / **созда́л еси дом священный /** и, несвя-
щенный собо́р несвященныя ле́сти преложи́в
наказа́ньми, / **всех Богу освяти́л еси.**

Богородичен:

Ма́терь, Деву Отроковицу, / Божественным
просвеща́еми Духом, Пречистая, / **священнии**
пророцы священными Тя гла́сы провозвести́ша, /
из Неяже Бог Слово, па́че вины́ же и слова,
воплоти́ся за милосердие безчи́сленное.

Песнь 6

Ирмос: Ри́зу мне пода́ждь све́тлу, / одея́йся светом, яко
ризою, / **Многоми́лостиве Христе, Боже наш.**

Сокруша́емо тело / ра́нами явля́ше правость
твоея́ совести, **страстотерпице, /** ко Христу Богу
нашему.

Ви́сящи высоко́, раны, мученице, терпя́щи / и
не уязвлено храня́щи души **благородие, досто-**
хва́льная.

Претерпе́ла еси зубо́в, и рук, и ног отъя́тие,
мученице **многострада́льная, /** **взираю́щи ко Хри-**
сту, Жениху твоему.

Богородичен:

Человеколю́бца рождши, Бога, Благолю́бивая
Владычице, / **Того моли́ геенны огня́ изба́витися**
нам.

Ин

Ирмос: Мо́литву пролию́ ко Госпо́ду / и **Тому возведу́**
печали моя, / яко **зол душа́ моя испо́лнится /** и **живот мой**
аду прибли́жися, / и **молю́ся, яко Ио́на: /** от тли, **Боже,**
возведи́ мя.

Светильника, тя, су́щии во тьме преле́сти,
неле́стно наста́вляю́ща, / **обрети́ше к путе́м жизни,**
Богонóсе, / **неведения́ тьму отложи́ша и яви́шася**
светови́дни верою Божественною, Авраамие.

Бóдренно, умолив Бога, / посылаеши просвещение спасения / сущим в но́щи идолонеи́сто́вства одержимым, / Богомудре Авраамие, / и показал еси вся сыны Света и Дне благодатию.

Безмолвно твою жизнь совершив, яже в житий треволнения, всеблаженне, / Божиими надеждами прешел еси / и к тихим пристанищем достигл еси, Авраамие, / Небеснаго Царства и Божественныя светлости.

Богородичен:

Отягчена мя дреманием уныния, / возстави Твоим ходатайством, Мати Божия, / и не даждь уснути в смерть греха, Дево, / предстательницу бо и путевожда́ моея жизни напи́сую Тя.

Кондак Авраамия, глас 3.

Подобен: Дева днесь:

Во плóти, яко Ангел, на земли явился еси, / и пощением был еси, яко древо насажденное, / водою воздержания дóбре возрастився, / и теченьми твоих слез сквёрну омыв: / сего ради явился еси приятелище Божественное, Авраамие, Духа.

Икос:

Тлénная презрѣв, нетленные восприял еси красоты / слáсти плотскія возненавидел еси, мудре, / измлада возлюбив чистоту. / Тем, чертога мирскаго отбежав, / сопружницы же благославныя и родителей уклонився, / Единаго Бога ясно, Рачителя, возжелав / и возлюбив от всея, отче, души и сердца истинно: / сего ради показался еси девства и чистоты приятелище Божественное, Авраамие, Духа.

Песнь 7

Ирмос: **О**троцы еврейстии в пещи / попраша пламень дерзновенно / и на росу огонь преложивша, вопиюще: / благословен еси, Господи Боже, во веки.

Шум гласа празднующих идеже есть ликуеши, страсотерпице, / с девами Богу Зиждителю песнопойщи: / благословен еси, Господи Боже, во веки.

Уды сокрушаемы зрящи и ногтей истерзание терпящи, / принеслася еси Богу жертва, песнопойщи: / благословен еси, Господи Боже, во веки.

Явилася еси́, яко лоза́, Богому́драя, / рúце и нóзе, яко ветви, ре́жемы и нам мысленно вино источа́ющи, / сердца́ утеша́ющее и страстéй отрeвáющее пьянство.

Богородичен:

Во всего человека облéкса Несквeрный, кромé греха, / из утробы Твоея, Чистая, прóйде Плотно́сец, / Егоже умоли верою Тя чествúющиа спасти.

Ин. Ирмос тойже

Да вb́шнее Царство получи́ши и славу неизречeнную, / славу же попира́емую, мудре, и тленную / яко смыслен и разумен преобíдел еси му́дренно.

Егда́ волк лукавый а́гницу твою растóргне льстивне, / тогда сего, мудре, чeлюсти сокрушил еси / сию же яко пастырь изрýднейший к жизни привел еси́.

Законом повинúяся Владычним, заблúждшее взыскал еси и обрeл еси, / и, на ра́мена твоя взем, всеблаженне, / яко пастырь ввел еси во ограда́ покая́ния.

Богородичен:

Едина Единаго от Троицы родила́ еси во дву существу, / Ипостáси же единой Вíдимага, Дево. / Емуже песнопeм: / благословен еси, Господи Боже, во веки.

Песнь 8

Ирмос: Седмери́цею пещь / халдeйский мучитель / Богочестивым нейстовно разжжe, / силою же лучшею спасeны сия́ виде́в, / Творцу и Избáвителю вопияше: / óтроцы, благословите, / священницы, воспойте, / лóдие, превозносите во вся веки.

Юношески дóбльствовавши, страстoнóсице всехвáльная, / и на прeлесть воздвигла еси побeды / рук бо лишeния и ног терпела еси, / сосцeв же и зубóв твоих искоренeние, мученице, претерпeла еси, в радости песнопoющи: / людие, превозносите Христа во веки.

Всесветла́, яко солнце, дeвства свeтлостьми / и мучeния добрoтами облистáла еси, / и мир просветíла еси светолúчными сия́нии твоего терпeния, страстотeрпице, вопиющи: / óтроцы, благо-

словите, священницы, воспойте, / людие, превозносите Христа во веки.

Осквернённую страстьми душу мою, Богоневесто, / и очернённую прилоги змия твоими мольбами от лютых очисти, / и светлым осенением твоим, мученице Анастасие, озари вопити: / священницы, пойте, людие, превозносите Христа во веки.

Богородичен:

Тя, Чистую и Непорочную, дева желаючи, / непорочно и тело и душу соблюде, / страстей подпаления терпением испепеливши, искушение же многих претерпевши мук, / и ныне в Небесных чертозах ликует с Тобою, веселящися во вся веки.

Ин

Ирмос: Победители мучителя и пламене / благодатию Твоею бывше, / заповедем Твоим zelo прилежаще, / отроцы вопияху: / благословите вся дела Господня Господа.

В погибели ров чистую сверже голубицу твою злодейственный змий, / но сию извел еси, отче, всемудренно, / благословите, поя, дела Господа и превозносите Его во веки.

И в житий обходя, отче Авраамие, / и по кончине врач болящих явился еси Духа благодатию Божественною, / благословите, поя, дела Господа и превозносите Его во веки.

Незлобием, блаженне, правдою же и целомудрием, и верою просияв, / Ангелом, преподобне, счислился еси, / благословите, поя, дела Господа и превозносите Его во веки.

Богородичен:

Струи живыя явилася еси всесвятое селение, / от Неяже пьюще, умертвившиися, Жизнь наследуем, вопиюще: / благословите дела вся Господа и превозносите Его во веки.

Песнь 9

Ирмос: Ужасеся о сем Небо / и земли удивися концы, / яко Бог явися человеком плотски, / и чрево Твое бысть пространнейшее Небес: / тем Тя, Богородицу, / Ангелов и человек чиноначалия величают.

На древе повешена была еси, / Слова Божия образующи страсть блаженную, / и отсечение терпела еси рук твоих и ног, / зубов искоренение,

языка же отрезание и сосцев, чистая Анастасие, /
монашествующих славо и мучеников украшение.

Яко невеста, украсилася еси добротой, / обру-
чившись Жениху страданьями добротворными, /
внутри же чертогов световидных, яко избранная,
вселилася еси, носящи свещу девственную. / И
ныне царствуеши с Живущим во веки, Анаста-
сие, сияючи.

Искапают болезни твоя сладость, греха го-
ресть отъемлющу; / рака же точит исцелений
реки / и потопляет вся страсти, и недуги лютыя в
славу Спасову, честная Анастасие, / иже по до-
стоянию тя славят.

Доблествоваша жены, Твоим Крестом ук-
репльшися, Христе Всесильне, / и вражью главу
многокозненную мужески, Слове Божий,
сокрушиша, / и, рай радостно селение получив-
ше, обожение прияша дивное, воспевающе Тя.

Богородичен:

Понесшаго Тя плоть от Жены, яко позна
мученица Твоя, Господи, / девственными украше-
на лучами и мучения кровию обогрена, / Тебе,
Богу, во след Матере Твоея, славно приведеса, /
яко царствующему тварию.

Ин

Ирмос: **В**ойстинну Богородицу / Тя исповедуем, / спасен-
нии Тобою, Дево Чистая, / с Безплотными лики Тя вели-
чающе.

Видети сподобился еси, отче Богоносе, / чрез
надежду тебе древле желаемая, / ихже око не
виде и ухо не слыша.

Красен явился еси, / Божественными доброде-
телей лучами сияя, Авраамие, / и красному Вла-
дыце, радуясь, предстоиши.

Совокупился еси ликом всех преподобных, / и
с ними обожения, преподобне, получив, / моли
еже спастися всем нам.

День веселия приводит радостно, / священное
твое, Авраамие, успение, / Церковь чествующи
житие твое.

Богородичен:

Благолюбивая Дево, / озлобленную грехом ду-

шу мою ублажи́ / и благ Небесных причастника сотвори.

На Литургии: прокимен, глас 7: Честна́ пред Господем смерть преподобных Его. Стих: Что воздам Господеву от всех, яже воздаде ми. Апостол к Галатам, зачало 213. Аллилуия, глас 6: Блажен муж: Стих: Сильно на земли́ будет семя его. Евангелие от Матфея, зачало 43. Причастен: В память вечную:

В
ТОЙЖЕ
ДЕНЬ



Преподобнаго отца нашего Авраамия Ростовскаго, чудотворца

НА МАЛОЙ ВЕЧЕРНИ

Стихиры на 4. Самогласны, глас 4:

Вéрою и любовию, празднолю́бцы, соше́д-
шеся, / псалмы́ и пёсньми восхва́лим днесь / Не-
бе́снаго человека и земна́го Ангела, / к нему́же
возопи́м: / о всеблаже́нне и преподо́бне, по́стни-
ков похвало́! / о нас моли́ся ко Господу, / Авра-
амие, о́тче наш, / поми́ловатися душáм нашим.

Честный́ и светоно́сный, преподобне, твой
пра́здник / исполнен ра́дости и веселия
духо́внаго. / Тёмже соше́дшеся мона́хов
мно́жества / и христоименítiи лю́дие, / любóвию
восхваля́юще, / блажи́м Божественная дея́ния
твоя / я́ко бо крин во удо́лии процвел еси / и
благово́ниши душе́вная наша чу́вства, / Авра-
амие, о́тче наш, / моли́ спаст́ся душáм на́шим.

Я́ко уязви́лся еси желáнием Божéственным, /
преподобне о́тче наш Авра́амие, / взем бо крест
твой, / последовал еси́ Влады́це Христу́. / Тогда
вся плотскáя мудровáния умертвил еси / и насле-
довал еси войстинну крóтких землю, / причáсти-
ем обожа́емь, / неизреченнаго о́наго веселия
наслажда́ясь, / поминáй нас, творя́щих всесвяту́ю
и пречестну́ю твою́ память.

Слава, глас 8:

Преподо́бне и Богоблаже́нне о́тче наш
Авра́амие, / войстинну сподóбился еси́ Божé-
ственныя жизни, / постóм бо и бдéнием изнури́л

еси́ тело твое, / темже и образ был еси монахов. /
 Аще бо и телесный язык умолче, / но чудеса
 свидѣтельствууют. / Град же Ростов, проповѣдуя,
 хвалится: / имею в себе, глаголя, неистощимое
 сокровище. / Сами бо зряще многая и преславная
 твоя чудеса, от мощей бываема, / иже прославляют
 прославльшаго тя Господа, / Емуже моли́ся даро-
 вати вселенней мир и велию милость.

И ныне, Богородичен.

На стиховне стихиры, глас 2:

Духа Святаго теплотою, мудре, / желание
 сердца твоего, еже к Богу, согревав, / и зиму
 страстей умертвив, / многокозненную же силу
 идола Велеса низложил еси, / в конец немощна
 сего показав. / Небесная же воинства удивил еси
 терпением твоим, / яко постников подражатель и
 преподобных сожител, / моли́ спастися душам
 нашим.

Стих: Честна́ пред Господем / смерть преподоб-
 ных Его.

Крест твой взем, преподобне Авраамие, / креп-
 ко последовал еси́ Христу, / нас ради на Кресте
 распеншемся; / и Того ради любви́ вся оставил
 еси́, / и Того еди́наго возлюбил еси: / Емуже и со
 Ангелы предсто́я, / моли́ ущедрити мир и спасти́
 души́ наша.

Стих: Блажен муж, бойся Господа, / в запове-
 дех Его восхо́щет зело́.

Яко прием, отче, Небесное семя, / плод стори-
 чествующь добродетели принесл еси, / Авраамие
 отче наш, / пита́я благочестно гла́дом та́ющих
 добродетели, / отонудуже исцеления верою при-
 ходящим пода́еши. / Темже, яко имѣя дерзнове́ние
 ко Христу, / моли́, преподобне отче наш
 Авраамие, / спастися верою и любовью́ честву-
 ющим па́мь твою́.

Слава, глас 8:

Приидите, монахов множества, днесь, / псалом-
 ская пѣния и цвѣты духовныя принесем, / яко
 войстинну монашескому удобренію и преподоб-
 ных сожителю. / Егоже хваляще, сїце рцем: /
 радуйся, свѣтильниче многосвѣтлый, приведый

ко Христу монахов множества./ Радуйся, града Ростова похвала и утверждение/ и всех верных благоутышное пристанище,/ и очищение болящих во гресех,/ на Божественная тья возвышая рачения./ Тем, в пречестную память твою, святую и ангелоговейную,/ собравшися, преподобне отче наш Авраамие,/ и Божественного человеколюбия просим получи́ти твоими молитвами,/ миру мир даровати и душам нашим велию милость.

И ныне, Богородичен.

Тропарь, глас 1:

Просветився Божественною благодатию,/ неверныя люди наставил еси к свету Богоразумия:/ и по смерти сияя светлостию жития твоего,/ источаеши исцеления притекающим с верою к тебе,/ Авраамие отче наш,/ Христа Бога моли даровати нам велию милость.

Слава, и ныне, Богородичен воскресен.

НА ВЕЛИЦЕЙ ВЕЧЕРНИ.

На Господи, возвах: стихиры, на 8, глас 1.

Подобен: О дивнаго чудесе:

О преславнаго чудесé!/ Источник благочестия в Ростове является/ и лэствица к Небесі Авраамий бывает нам;/ веселится град Ростов, имея в себе мощи того./ Радуется православных мно́жество,/ Авраамия иму́ще в бедах заступника,/ и к нему вопиюще:/ преподобне, радуйся/ и Господу моли́ся/ даровати душам нашим мир и велию милость.

О дивнаго чудесé!/ Ветвь благодати в России воспитовáется/ и кипарис добровонный в Ростове возрастáет,/ и столп непоколеблемь православным утверждается,/ и крепкий адамант душею бывает Авраамий Богоблаженный./ Тем Богомудрых собори на высоту́ духом вознесите́ся,/ преподобному вопиюще:/ отче Авраамие, радуйся/ и Господу помолі́ся/ даровати душам нашим мир и велию милость.

Дивны твоя тайны, Христе Боже,/ яко даровал еси нам таковаго светильника,/ Авраамия предоблаго,/ православному отечеству нашему на сопротивныя поборника,/ Велеса погубивша-

го и храм Имени Твоему святому воздвигшаго,/ в немже Имя Твое прославляется/ и вѣрнии укрепляемся,/ припадающе к Тебе, всех Владыце,/ просяще, Человеколюбче, / даровати душам нашим мир и велию милость.

Слава, глас 5:

Добродѣтели подражателя похвалим днесь,/ Авраамия, похвалу Российскую,/ и память его светло торжествуим,/ верных собори сошедшеся в церковь Господню,/ и к нему сице вопиюще:/ прииди ныне, преподобне,/ и о нас непрестанно молися,/ празднующих твое торжество,/ да твоими молитвами дарует нам Христос/ велию и богатую милость.

И ныне, Богородичен: В Черном мори:

Вход. Прокимен дне. Чтения 3.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго./ Сего ради примут Царствие благолепия и венец доброты от руки Господни:/ зане десницею покрывает я и мышцею защитит их./ Приимет всеоружие ревние свое, и вооружит тварь в месть врагом./ Облечется в броня правды и возложит шлем, суд нелицемерен./ Приимет щит непобедимый, преподобие;/ поострит же напрасный гнев, во оружие: споборет же с ним мир на безумных./ Пойдут праволучныя стрелы молниины,/ и яко от благокругла лука облаков на намерение полетят./ И от каменометныя ярости исполнь падут грады,/ вознегодует на них вода морская, реки же потопят я нагло./ Спротив станет им дух силы, и яко вихор развеет их,/ и опустошит всю землю беззаконие, и злодейство превратит престолы сильных./ Слышите убо, царие, и разумейте, навыкните судий концев земли./ Внушите держащии множества и гордящися о народах языков:/ яко дана есть от Господа держава вам и сила от Вышняго.

Премудрости Соломоновы чтение (глава 3):

Праведных души в руке Божией, и не прикоснется их мука./ Непщевани быша во очесех

безумных умрети, и вменися озлобление исход их:/ и еже от нас шествие сокрушение, они же суть в мире./ Ибо пред лицем человеческим, аще и муку приимут, упование их бессмертия исполнено./ И в мале наказаны бывше, великими благодетельствовани будут,/ яко Бог искуси я и обрете их достойны Себе./ Яко злато в горниле искуси их, и яко всеплодие жертвенное прият я./ И во время посещения их возсияют и яко искры по стebлюю потекут./ Судят языком и обладают людьми, и воцарится Господь в них во веки./ Надеющиеся Нань разумеют истину, и вернии в любви пребудут Ему./ Яко благодать и милость в преподобных Его,/ и посещение во избранных Его.

Премудрости Соломоновы чтение (глава 4):

Праведник, аще постигнет скончатися, в покои будет./ Старость бо честна, не многолетна, ниже в числе лет исчитается./ Седина же есть мудрость человеком, и возраст старости, житие нескверное./ Благоугоден Бoгoви быв, возлюблен бысть,/ и живый посреде грешников, преставлен бысть./ Восхищен бысть, да не злоба изменит разума его,/ или лесь прельстит душу его./ Рачение бо злобы помрачает добрая, и парение похоти пременяет ум незлобив./ Скончався в мале исполни лета долга:/ угодна бо бе Господу душа его: сего ради потщася от среды лукавствия./ Людие же видевше и не разумевше, ниже положше в помышлении таковое:/ яко благодать и милость в преподобных Его,/ и посещение во избранных Его.

На литии стихиры, глас 6:

Приидите, празднолюбцы/ и постник сословие,/ верою сошедшеся,/ яко истиннаго постника почтим Авраамия днесь,/ шествовавшего по стопам Владыки своего/ узкий путь, и безстрастную жизнь,/ и верою возопийм:/ о всеблаженне сожителю преподобных/ и постников похвало,/ о нас молися ко Господу/ помилovati-ся душам нашим.

Преподобне отче Богонoсе Авраамие,/ от матерних пелен Богу возложен еси/ и любви ради

Того вся оставил еси, / и, идола Велеса сокрушив, / коварства его вся стерл еси, / и, обитель составив, множество монахов собрал еси / славити многопетую Троицу, / Юже моли, блаженне, / спастися душам нашим.

Иже на земли Ангела / и на Небесех человека Божия, / мира благое украшение, / пищу благих добродетелей, / постников похвалу, / Авраамия, почтим: / насажден бо в дому Божии, / процветет праведно, / яко кедр в пустыни, / в преподобстве и правде.

Слава, глас 8:

Монахов множества / наставника тя почитаем, отче наш Авраамие, / твоею бо стезею войстинну право ходити познахом, / блажен еси, Христу рабобав, / и вражью обличил еси силу, / Ангелов собеседниче, / преподобных сопричастниче и праведных. / С ними же молися Господеви / помилуватися душам нашим.

И ныне, Богородичен: Безвестная Дево:

На стиховне стихиры, глас 1.

Подобен: Небесных чинов:

Небесных чинов ревнитель, / тех житие пожив, / в мертвенном телеси, яко Ангел, показался еси. / Сего ради, от Христа Бога дар чудес прием, / и нам обильно исцеления подаваеши, / и от всяких скорбей спасаеши к тебе притекающих, / яко на тя упование возлагаем / и твоими молитвами от бед избавляемся, / отче Авраамие.

Стих: Блажен муж, бойся Господа, / в заповедех Его восхоцет зело:

Небесных чинов радование / твое житие, святе Авраамие, / и на земли человеком скорый в бедах заступниче, / молися о нас, к тебе притекающих / и твое преставление празднующих, / яко на тя упование возлагаем / и твоими молитвами от бед спасаемся.

Стих: Праведник, яко финикс, процветет, / яко кедр, иже в Ливане, умножится.

Небесный человек явися нам и земный Ангел / проповедуется днесь Авраамий освященный, / егоже житию удивися Ангели / и вострепетав-

ша дуси лукавии, / той нами празднуется днесь. /
И того торжество ликовствующе, вопиём: / моли,
преподобне, Христа Бога, / да твоими молитвами
от враг свободимся.

Слава, глас 6:

Днесь верных собори сошедшеся, / восхвалим
отца нашего, / духовно веселящися и память его
свѣтло празднующе, / яко вражия полки
прогнавшего / и дѣмона посрамившаго, / и злаго
идола Велеса искоренившего, / и град Ростов
купелию Святаго Духа обновльшаго, / и ныне
сияюща чудесы, Авраамия предобляго; / яко да
того молитвами дарует нам Христос / велию и
богатую милость.

И ныне, Богородичен.

Тропарь, глас 1: Просветився Божественною благода-
тию: Писан на малой вечерни.

НА УТРЕНИ

Тропарь святаго, дважды. Слава, и ныне, Богородичен.

По 1-м стихословии седален, глас 4:

Крепкий душею адамант явился еси,
преподобне, / непоколеблемо основание в вере
имеяй, отче Авраамие. / Сего ради гнусаго идола
разорил еси / и в нем демонския полки победил еси
яко добр воин Христов. / Емуже молися, да спасет
тебе ради души наша.

Слава, и ныне, Богородичен:

Радуйся, Владычице, Небесная Царице, / Бога
плотию нам рождающая, / единого Агнца, за нас
волею пожертвовагося. / Того моли, Всеблаженная, /
да Твоими молитвами спасет души наша.

По 2-м стихословии седален, глас 2:

Молитв твоих требуем, грешнии, / и тыя нам
подаждь, отче Авраамие, / яко да, наставляеми
ими, прейдем к небурному пристанищу / и венцы
Небесныя улучим, / и тебе воспеваем: / радуйся,
отче отцев, / похвала наша и утверждение.

Слава, и ныне, Богородичен:

Молитвы Твоих раб прими, Богородице, /
Заступнице наша и прибежище: / к кому бо
прибегнем, разве Тебе, Владычице, / Ты покров
наш и заступление. / И ныне не остави нас до

конца погѣбнути, / да Твоими молитвами от бед сохраняемся, / на Тя бо упованіе с Богом, Богородице, возложѣхом.

По полиелеи седален, глас 5:

Апостолов ревнитель быв, преподобне, / сего ради и Богослову бесѣдовати сподобился еси / и, сего жезл приѣм, Велеса разрушил еси / и того козни до конца искоренил еси, / и неверныя ко Христове вере привел еси. / Ныне же Христа Бога моли о чтущих память твою, / даровати нам мир и велию милость.

Слава, и ныне, Богородичен:

Хранителище неложное Содетеля нашего, Владычице Богородице, / сохрани град и люди, имя Твое святое славыящая, / и покрый покровом милости Твоея: / Тя бо теплу Предстательницу имамы / ко из Тебе рождшемуся Христу, Богу нашему, / да Твоими молитвами спасет души наша.

Степенна, 1-й антифон, 4-го гласа.

Прокимен: Честна пред Господем смерть преподобных Его. Стих: Что воздам Господеву о всех, яже воздаде ми. Всякое дыхание: Евангелие, Матфея, зачало 43.

По 50-м псалме стихира, глас 8:

Приидите, монахов множества, / приидите, пустынное воспитаніе, / приидите и лик составим, / днесь бо трапеза поставляется / и паче благовонных аромат / облагоухает нам память преблаженнаго Авраамия. / Приидите, стецемся к преподобному, / обильно нам источник чудес источающему, / и любезно целуем икону его, и к нему возопийм: / отче Авраамие, / твоими молитвами проси нам у Христа / мира и велия милости.

Канон Богородицы на 6
и преподобнаго на 8. Глас 1.

Песнь 1

Ирмос: Горькия работы избавлься Израиль, / непроходимое пройде, яко сушу, / врага зря потопляема, / песнь яко Благодетелю поет Богу, чудодеющему мѣшцею высокою, / яко прославися.

Лютыми страстьми побеждаем есмь, оканный, / и сего ради молю Тя, Христе Боже, от сих избавити мя, / яко да по достойнию возмогу

воспети Твоего угодника, Авраамия преподобнаго.

Лю́тых смущений свободи́ мя, отче, / да наставляем твоими молитвами, / свѣтло воспою́ твое торжество, Богоносе Авраамие.

Лю́таго ідола искорени́л еси, отче преблаженне, / и ко Христу привел еси неверных соборища, / и ты́я, яко кедр, иже в Ливáne, умно́жил еси твоими молитвами, / во сто плодоно́сѣщия и врага попира́ющия.

Богородичен:

Лю́тых напа́стей и многих прегрешений свободи́ мя, Владычице, / и прощение подаждь ми, / яко дерзну́х написати моею скверною десни́цею святое Твое имя.

Катавасия: Отверзу уста моя:

Песнь 3

Ирмос: Да утверди́тся сердце мое в воле Твоей, Христе Боже, / Иже над вода́ми небо утвержде́й второе, / и основа́ый на вода́х зѣмлю, Всесильне.

Да утверди́тся сердце мое молитвами твоими, святе, / и научи мя, недостойнаго, похвалі́ти по достоинству преславную память твою, / Богоносе отче наш Авраамие.

Да утверди́ши ны, Богомудре, на безплотныя враги́, еже прогони́ти ты́я, / твою же память велича́ти и Христа прославляти, / тебе прославльшаго, отче Авраамие.

Да утверди́мся на ка́мени непоколеби́мем твоих молитв, / да не поколе́блют нас прило́зи льстиваго / и ум наш просвети светом заповедей Христовых, / яко да верою воспеваем тя, преблаженне Авраамие.

Богородичен:

Да утвержде́н буду милостию Твоею, Владычице, / и покрове́н кровом крил Твоих, Богородице, / и избе́гну сетей лукаваго, воспевая преславное Твое торжество.

По 3-й песни седален, глас 5:

Апостолов ревни́тель быв, преподобне, / сего ради и Богослову бесе́довати сподо́бился еси / и, сего́ жезл при́им, Велеса разруши́л еси / и того козни до конца искорени́л еси, / и неверныя ко

Христове вере привел еси./ Ныне же Христа Бога моли о чтущих память твою,/ даровати нам мир и вѣлию милость.

Слава, и ныне, Богородичен:

Победу имуще крепкия силы на Тя любовию верно надеющихся,/ Чистая Царице Дево Богородице, врагѣ покаряюще, побѣрницу имущи Тя, веселимся.

Песнь 4

Ирмос: Разумѣх, Всесильне,/ Твое смотрение,/ и со страхом прославих Тя, Спасе.

Разумех, преподобне, мое недостойнство/ и со страхом коснѹхся к твоему хвалѣнию,/ но ты, святе, приими, яко убѣгнѣя две цѣте, с верою тебе приносимое хваление, всехвальне отче Авраамие.

Разумел еси, отче преблаженне, коварствія лукаваго Велѣса/ и сего до конца низложил еси,/ нас на молитву воздвѣгни днесь,/ да верно ликовствуем, преблаженне, в памяти твоей, отче Авраамие.

Разумел еси, святе, дѣмона во умывальницу твою вшедша и пакость тебе сотворити хотѣща,/ сосѹд крестом покрыв, того опалил еси:/ ныне же нас спаси от его ловления твоими молитвами, отче Авраамие.

Богородичен:

Разумела еси, Владычице, воплотившагося из Тебе Христа Бога нашего,/ Того моли, Богоблаженная,/ да Твоими молитвами сохранит нас от всякаго навѣта лъстиваго.

Песнь 5

Ирмос: От нѣщи ѹтреннююще, воспеваетъ Тя, Христе Боже,/ обнищавшаго нас ради/ и Крест, и смерть плотию претерпевшаго.

Из нѣщи тьмы глубѣкия возвел еси люди твоя/ и, покаяннѣя светом просветив, ко Христу привел еси, Богоносе Авраамие,/ и нас просвети, блаженне, сиянием твоея благодати, яко да присно ты ублажаем.

Из нѣщи идолонействовства извлѣкл еси, отче, множество людей/ и сих погруженнѣем благодати озарил еси дѹховныя;/ и ныне нас озари светом

невещественным, и молитвами твоими просвети, яко да по долгу величаем тя.

Из но́щи страсте́й моих возведи мя, святе, и да́руй ми свет мѣсленный, / да возмогу, недостойный, от гру́баго ума́ моего худѡе сие́ плетѣние принести к похвалению чудес / преславнаго твоего торжества, Богоносе Авраамие.

Богородичен:

Из но́щи а́да преиспо́дняго изведе́ ны Сын Твой, Пречистая, / и рай жители паки соделав: / сего ради, поклоня́ющесе́ Ему, Тебе, Дево, ублажаем.

Песнь 6

Ирмос: Отвѣргл мя еси во глубины́ се́рдца морска́го / и спасл еси мя, Спа́се, от работы сме́ртныя, / и разрешил еси ўзы беззаконий моих.

Отверго́шася неразу́мнии твоего учения, блаженне, / и к Велѣсу, глу́ху и́долу, ниже́ глаго́лющу, ниже́ осяза́ющу притека́ху. / И егда сего пробѡл еси трѡстию Богосло́вовою, / тогда и сих к разу́му благочестия наста́вил еси, отче Авраамие.

Отвѣржен есмь в ров неча́яния, многостра́стный, / но ты возведи́ мя, святе, на стезю́ покая́ния, / яко да отвѣргу́ вся моя́ злая дея́ния / и облеку́ся светом молитв твоих, отче Авраамие блаженне.

Отвѣржен быв ока́янный де́мон, восхотѣ спѡну тебе сотвори́ти, / преобразу́ется в воина лукавый, / и предстае́т тогда вла́дущему благоверному князю Влади́миру, и того на тя вооружает. / Ты же, сего прогнав, вѣщше прославля́еши́ся и князя в вере утвержда́еши.

Богородичен:

Отвѣрзи́ мне, Владычице, двери милости Твоя́, / якоже Сын Твой отвѣрзе разбойнику и блудни́це, и блудному двери милосердия; / яко да и аз Твоими молитвами уллучу́ жизнь вечную, воспева́я Твою́ благодать.

Кондак, глас 2:

И́го Христо́во приѣм, Авраамие, / и Того крест на ра́мо взем, / последовал еси́ Ему, / насаждѣн

быв в дому Господни / и процвёл еси, яко фíникс
и яко кедр, иже в Ливане, / умножил еси чада
твоя, муж желáний духовных: / от возлюбленнаго
же апостола Иоанна Богослова благодать
восприим, / жезлом сокрушил еси íдола / и рас-
сыпал еси его, яко прах, / и чудотворец убо
вѣлий явился еси, преподобне. / Темже Христа
Бога моли / непрестанно о всех нас.

Икос:

Авраамие Богомудре, житие непорочно стя-
жал еси, / и кий язык человек довлѣет когда к
похвале повѣдати, яже о тебе; / обáче воспоем
Божью мудрость и твоя, преподобне, страсти и
подвиги, яже на земли, / яко светильника тя
явльшася всем человеком и многим терпением в
лице Ангельстем возсиявша. / Тем в песнех вопи-
ем ти сѣце: / радуйся, Авраамие преподобне и
Богоносе, Небесный человеке и земный Ангеле. /
Радуйся, Духа Святаго обителище. / Радуйся, яко
из млада последовал еси Святей Троице. / Радуй-
ся, целомудрия стóлпе, низложивый демона
многоковáрственнаго. / Радуйся, яко от младых
ногтѣй последовал еси Христу. / Радуйся, све-
тильниче многосветлый, приведый ко Христу
монахов множества. / Радуйся, разоривый íдола
и воздвигнувый Христову Церковь. / Радуйся,
иже идолопоклóнники сотворил еси Пресвятей
Троице поклонники. / Радуйся, яко молитвами
твоими дѣмони побеждаются. / Радуйся, граду
Ростову похвала, / яко первую общую обитель
воздвигл еси, и в ней многия монахи, яко виног-
рад Христов, насадил еси / и Троицу славити
научил еси. / Радуйся, православному отечеству
нашему похвала и утверждение, / егоже соблюди
молитвами твоими от враг ненавѣтно, да зове-
м ти: / радуйся, отче Авраамие блаженне, / и Хри-
ста Бога моли непрестанно о всех нас.

Песнь 7

Ирмос: Явлѣйся в купинѣ законоположнику огнём, / и
рождество Девы прообрази в ней, / благословен еси
Господи, Боже отец наших.

Явился еси в России светильник пресветлый,
отче Авраамие, / Трисолнечными светосиянии к

Богознанию нас приводя и пети научая:/ благословен Бог отец наших.

Явился еси река медоточных учений, Богоносе,/ верныя напаяя, грехи же потопляя/ и к познанию благочестия всех возводя, и научая пети:/ благословен Бог отец наших.

Явлься тебе ученик Христов Богословеснейший и девственник возлюбленный,/ трость тебе, блаженне, дарова, еюже диавола пробол еси/ и к тому невидима сего сотворил еси, и человеки научил еси вопити:/ благословен Бог отец наших.

Богородичен:

Явлёйся яко Человек Сын Твой, Богоневесто,/ нас обожь и к разуму милости возведё,/ и во свете неприступнем ликовати устрои воспевающая и глаголющая:/ благословен Бог отец наших.

Песнь 8

Ирмос: Песнь Тебе приносим безплотных,/ якоже отроцы в пещи, и, поюще, глаголем:/ благословите вся дела Господня Господа.

Песнь тебе приношу, отче Богоносе Авраамие,/ еюже проповедаю твоя подвиги и чудеса,/ и прославляю твое величество, вопия:/ благословите вся дела Господня Господа.

Песнь приносиши Христу, ликуя со Ангелы, отче Авраамие,/ тех бо житию поревновал еси/ и нас в память твою ликовати устроил еси, поющих:/ благословите вся дела Господня Господа.

Песнь поёши Херувимскую, имже и подобник был еси,/ крыла огненная восприем, имиже Горняго Иерусалима достиг,/ о нас молися, отче Авраамие, поющих верно:/ благословите вся дела Господня Господа.

Богородичен:

Песнь прими, Владычице, от несовершеннаго ума нашего/ и молися Сыну Твоему и Богу нашему, подати нам оставление грехов,/ яко да воспеваем Тя во вся веки.

Песнь 9

Ирмос: Живоприёмный источник приснотекущий,/ светоносный светильник благодати,/ храм одушевленный,/

сень пречистую, / Небесé и земли пространнейшую, / Богородицу, вернии, величаем.

Живоносный источник благодатных вод явился еси, Авраамие Богоблаженне: / подаждь ми источник слез, / да омью душевныя моя страсти и убелю светом покаяния очерневшую душу мою.

Живоносный Крест на рамо возьм, преподобне, / распеншемуся на нем Христу последовал еси, отче Авраамие, / и вражия полки прогнал еси, / и нам проси милости, торжествующим твое празднество, Богоносе.

Живоносным Крестом врага опалил еси / и, сего в сосуде запечатав, учеником работати отшел еси, / показуя смирения образ, и сих научая любомудренно последовати тебе.

Богородичен:

Источник рождши нам, Владычице, / житие мирно рабом Твоим испроси / и православному воинству нашему на иноплеменики пособствуй, / яко Ты еси спасение наше, / Богоневестная.

Светилен.

Подобен: Жены услышите:

Постнически пожив, отче Авраамие, и на враги власть приим, / яко и в сосуде тья затворят и крестом опалят; / и человеки от недуг исцелеваеши, притекающия с верою к тебе и почитающия, Богоносе, всечестную память твою.

Слава, и ныне, Богородичен:

Зачала еси во утробе Бога, / Егоже трепещут вся Небесныя силы: / Сего, Дево, родила еси плотию, наше естество обожившаго. / Егоже моли, Богоблаженная, с преподобным Авраамием, / да спасет Тебе ради души наша.

На хвалитех стихиры, на 4, глас 2.

Подобен: Егда от Древа:

Терпел еси гонения от неверных, / радовался еси надеемыми, / яже уготова Бог любящим Его. / Сего ради, преподобне, ветхаго совлékлся еси человека / и ветхаго искоренив идола, / благодатию же Крещения просветил еси град Ростов / и в нем, яко солнце, сияя чудесы, / Российскую

страну от бед спасаеши/ и от варварскаго нахождения./ Сего ради молим тя, отче Авраамие:/ моли Христа Бога спастися душам нашим.

Терпел еси от идолопоклонников гонения/ и радовался еси от Владыки Христа воздаянием,/ и к неверным вопиял еси:/ нуждно страдание, но радостно возмездие;/ многи скорби, но сладок рай./ И сего ради онъ, оставльше окаяннаго Велеса,/ к тебе притекаху, глаголюще:/ моли Христа Бога, отче Авраамие,/ да твоими молитвами спасет души наша.

Терпел еси от врага скорби/ и, радуясь, венец от Христа приемиши,/ Престолу славы предстои, со Ангелы ликуеши./ О нас непрестанно молися, преподобне,/ да твоими молитвами от бед и скорбей избавимся./ Тя бо тепла предстателя к Богу имамы,/ яко да тебе ради, отче Авраамие,/ спасет души наша.

Слава, глас 8:

Приидите, празднлюбных собори,/ приидите, православных торжество,/ приидите, монахов Богосочетанный личе,/ приидите, насытитесь нынешняго праздника./ Приидите, овчата, Господня духовныя ограды./ Приидите, да ликуим светло в память отца нашего,/ днесь бо Богоносный Авраамий/ ликует со Безплотными силами,/ предстои Престолу всех Царя Христа Бога,/ и молися о душах наших.

И ныне, Богородичен:

Владычице, прими молитвы раб Твоих,/ и избави нас/от всякия нужды и печали.

Славословие великое. И отпуст.

На Литургии: Блаженны святаго от канона, песнь 3-я и 6-я. Прокимен, глас 7: Честна пред Господем смерть преподобных Его. Стих: Что воздам Господеву о всех, яже воздаде ми. Апостол к Галатам, зачало 213. Аллилуия: Блажен муж, бояйся Господа: Стих: Сильно на земли будет семя его. Евангелие от Матфея, зачало 10. Причастен: В память вечную:

В
ТОЙЖЕ
ДЕНЬ

**Преподобнаго Авра́амия Затворника,
в Ближних пещерах почивающаго**

Тропарь, глас 2:

**Вéлия веры исправлénия, / в пещёрнем затво-
ре, яко на воде упокоénия, / преподобне отче
Авра́амие, радовался еси, / огнем бо любвё Боже-
ственным распала́ем, / бдением и молитвою без-
страстия достигл еси / и явился еси равноангель-
ный на земли, / того молитвами, Христе Боже,
спаси души наша.**

Кондак, глас 3:

**Во плоти яко Ангел на земли явился еси, / и
пощёнием, яко древо насаждénное при вода́х
воздержания, дóбре возрос еси, / течёнными же
твоих слез скверну омыв, Авра́амие, / явился еси
селение Божественное Святаго Духа.**

